



Sesida dals

22 d'avrigl 2024

Communitgà ils

23 d'avrigl 2024

Protocol nr.

360/2024

### **Incumbensa Degiacomi**

concernent ils instruments da promoziun per vischnancas che vulan fusiunar

### **Resposta da la Regenza**

La debatta dal segund rapport davart las structuras communalas (missiva, carnet nr. 3 / 2023–2024) en la sessiun da december 2023 ha mussà cleramain, ch'il Cussegl grond vul mantegnair la strategia actuala areguard las fusiuns da vischnancas. L'incumbensa qua avant maun parta dal fatg, che la dinamica da fusiun pudess vegnir rinforzada cun extender la pratica da promoziun. Ultra da quai duessan er pussaivladads d'agir vegnir chattadas ed utilisadas sin in auter nivel, uschia che la finamira quantitativa da sut 50 vischnancas pudess vegnir cuntanschida pli svelt. La finamira da l'incumbensa da rinforzar la dinamica en la refurma da vischnancas correspunda a quella da la Regenza.

En noss chantun han gì lieu numerusas fusiuns da vischnancas ils ultims var 20 onns. Sin plaun interchantunal vala il Grischun sco in dals chantuns precursurs, sch'ì sa tracta da la refurma da las structuras communalas. Suenten l'auta dinamica dals ultims onns n'èn strusch pli projects da fusiun vegnir iniziads l'ultim temp. Quai n'ha tenor l'avis da la Regenza da far nagut cun il sustegn finanziel apparentamain memia pitschen dal chantun. Cun var 200 milliuns francs è l'impundaziun dals meds finanziels stada considerabla. En blers lieus èn las structuras communalas consolidadas en il fratemp.

La Regenza avess – ultra da la promoziun materiala ed immateriala da fusiuns sin ils nivels da l'infurmaziun sco er ultra dal sforz – da princip pussaivladads d'agir, co che la dinamica da fusiun pudess vegnir stimulada. Dapi l'entrada en vigur da la Lescha chantunala da vischnancas (DG 175.050; LV) l'onn 1974 pudessan las vischnancas vegnir sfurzadas da fusiunar. Differentas revisiuns parzialas han concretisà quest concept, senza ch'el fiss vegnì applitgà fin ussa. Ina strategia che mettes en dumonda la voluntariadad da fusiuns na considerescha la Regenza dentant ni sco

politicamain acceptabla per la maioritad ni sco opportuna ord vista da la politica democratica.

La debatta dal Cussegl Grond davart il segund rapport davart las structurass communalas ha mussà, che la Regenza duai applitgar la promoziun da fusiuns cun l'apprèziar necessari, uschia che las finamiras determinadas vegnan cuntanschidas cun fusiuns voluntaras. Applitgond questa incumbensa strategica dal Cussegl grond ha la Regenza adattà – en connex cun il sulet conclus ch'è vegnì relaschà dapi lura per conceder ina contribuziun da promoziun (Cuir – Tschierschen-Praden) – il sector da la pauschala d'abitants sco er da la gulfaziun dal pe da taglia. En il rom da la contribuziun da cumpensaziun concediva la Regenza gia fin ussa ils meds finanzials necessaris en furma da pauschalas, quai per surpigliar per exempel ils eventuels custs che resultavan da l'execuziun u la gulfaziun da disparitads. Ils aspects centrals da l'incumbensa èn perquai gia vegnids ademplids.

La Regenza è conscianta, che la promoziun finanziala è in aspect impurtant, per che fusiuns possian vegnir realisadas. Las experientschas dals ultims onns mussan dentant er, ch'il chantun ha adina mess a disposiziun avunda meds finanzials. Naging project da fusiun n'ha fatg naufragi pervia d'ina contribuziun da promoziun memia pitschna. La contribuziun chantunala na po dentant betg surpigliar las pretensiuns da mintga singul project. Quai dess fauss impuls cun consequenzas finanzialas nunspetgadas per il chantun. La finala vai er per il fatg, che fusiuns vegnian decididas or da persvasiun interna da las votantas e dals votants locals e betg mo grazia ad in sustegn finanziel sproporzionà dal chantun.

La Regenza è, sco gia fin ussa, pronta d'applitgar generusamain la promoziun chantunala da fusiuns tenor las relaziuns individualas.

Sa basond sin questas explicaziuns propona la Regenza al Cussegl grond d'acceptar questa incumbensa e da la stritgar sco liquidada.



En num da la Regenza

Il president:

Dr. Jon Domenic Parolini

Il chancelier:

Daniel Spadin